



HARANGVE DV CHANCELIER
*de Brabant aux Estats Generaux des Pro-
 vinces Unies du Pays bas, sur la rupture de
 la Trefue.*

N Obles & puissans Seigneurs,
 les derniers iours de la Treue
 de douze ans, des Pays bas
 nostre communepatrie, nous
 representent deuant les yeux,
 par les preparatifs qu'on fait de part &
 d'autre, les tristes changemens qui suiuent
 ordinairement l'expiration de tels traitez;
 Ce qui a meu les Serenissimes Archiducs
 de penser meurement aux moyens neces-
 saires pour preuenir & diuertir les grands
 inconueniens qui en peuuent arriuer; Por-
 tez à ce sainct desir par leur inclination na-
 turelle à la Paix, & leur zele au bien public,
 qui ont estez les principaux motifs à les fai-
 re resoudre à vne Treue, comme yn com-
 mencement du total estanchement (tant
 souhaité) del'ardeur de la guerre, dedans
 laquelle leurs Alteesses ont à leur aduene-

ment trouué l'Estat, croyans que durant ladite Treue leurs actions ont assez tesmoigné leurs bonnes & sincères intentions, & pour l'aduenir leurs Alteſſes n'ont rien tant à cœur, que de procurer généralement tout ce qui pourra tendre à l'auantage de ces Pays, qui ſemble conſiſter en ce que toutes les parties & membres en dependans ſoyent reioints en vn corps ſoubs vn chef, eſtant tres apparant, que comme ils eſtoient deuant les troubles de noſtre temps en paiſible concorde & tranquille proſperité, qu'ils iouyroient encor du meſme, voire plus grand bon-heur, ſi les Prouinces de ce party cy ſelaſſoient diſpoſer à vn bon & ferme accord, ſoubs la recognoiſſance des Princes naturels.

C'eſt le poinct que leurs Alteſſes m'ont commandé de propoſer à vos Seigneuries, & leur repreſenter amiablement qu'ils ont iugé eſtre de leur deuoir (outre ce qui eſt allegué, auant qu'aucun nouuel acte d'hoſtilité interuienne) de faire c'eſt office de bons Princes, qui recherchent & affectionnent voſtre propre biē pour touſiours, afin que là deſſus ſoit deliberé & pris vne bōne reſolution, par laquelle l'effuſiō de ſang, les impoſitiōs exceſſiues, & autres miſeres que

Pays bas ont par tant d'annees esprouuees,
puissent vne fois & à iamais estre ostees & pre-
uenues: Et si vos seigneuries veulent sous ces
conditions entrer en communication d'ac-
cord, leurs Alteſſes se monſtreront prompts
pour embrasser toutes conditions & capitula-
tions equitables & raisonnables, En sorte que
vos seigneuries auront tout subiect de conten-
tement, & ne verront non seulement les effets
de la bonne volonte de leurs Alteſſes: Mais
aussi la sincerite & integre, laquelle elles ont
touſiours eue en ſinguliere recommandation,
& qu'elles ont iusques ici fait cognoistre par
leurs deportemens, & l'estroite & religieuse
obseruation de leurs promesses: Tellement
qu'on se peut entierement fier en eux; Aſſeurant
aussi vos Seigneuries, de pareille bonne & ſin-
cere intention de ſa Maieſte Catholique, &
qu'elle approuuera & ratifiera tout ce qui ſera
par leurs Alteſſes touchant cecy, traite & con-
clud. Signé,

P. PECKIUS,


P E R M I S S I O N.

IL est permis à Abraham Saugrain Libraire à Paris, imprimer & vendre *La Harangue du Chancelier de Brabant aux Estats Generaux du Pays-bas sur la rupture de la Trefue ; Ensemble la responce desdits Seigneurs Estats.* Et deffenses à tous autres de l'imprimer ny vendre sans le consentement dudit Saugrain à peine de confiscation, cinquante liures d'amende, & despens dommages & interests, suyuant la permission du 10. de cemois d'Auril 1621.

Signé,

Ferrant.

De l'Esrat.



RESPONSE DES ESTATS

Generaux des Prouinces vnies du Pays-bas, à la Harangue du Chancelier de Brabant, faicte en leur Assemblée à la Haye, sur la rupture de la Trefue.

LES Estats Generaux des Prouinces vnies des Pays bas, ayans ouy & examiné en leur Assemblée la Proposition du sieur Peckius sieur de Bouchâte Chancelier de Brabant, de la part des Serinissimes Archiducs en Brabant, faicte de bouche le 23. de ce mois, & exhibee par escrit, en vertu de ses lettres de creance, dattees de Bruxelles le 16. iour. Declarent que la souueraineté des prouinces vnies ne leur peut estre reuocquee en doute, & qu'ils l'ont tousiours vigoureusement maintenüe contre tous ceux qui l'ont voulu disputer, ou bien attenter quelque chose au preiudice d'icelle, ou l'attribuer à aucun prince; Que iamais ils n'ont voulu entrer en Traicté quelconque, qu'ils ny ayent esté recognus absolument Souuerains, dont ils ont faict des expresse declarations, tant à l'Empereur, qu'aux

Eslekteurs, Ducs & autres potentats, & spécialement ausdits Archiducs: Que l'Estat de leurs Seigneuries est reputé & tenu par les plus grâds Monarques, Roys, potentats, & Republiques, pour vn Estat souuerain, & leurs pays pour pays libres, & ont en ceste qualité fait avec eux plusieurs Traictez & alliances; estant assez notoire qu'ils ont refusé de Traicter avec lesdits Archiducs & le Roy d'Espagne, que prealablement ils n'eussent déclaré par Acte formel, qu'ils traictoient avec leurs Seigneuries, comme avec des pays & prouinces libres, sur lesquelles ils ne pretendoient rien. Et d'autant plus que tout ceci est manifeste à tout le monde, lesdits Seigneurs Estats trouuent tres-estrangela proposition du sieur Chancellier peckius, mettant en auant que le plus grand bien de leurs prouinces consisteroit en ce qu'elles fussent rassemblees en vn corps, & sous vn chef, & qu'elles se laissent persuader à vn bon vtile, & asseuré accord sous la recognoissance des princes Naturels, & si lesdits Seigneurs Estats vouloyent sous ces conditions entrer en conference d'accord, que les Archiducs en tel cas condescendroient à des conditions equirables: Car cette proposition ne peut aucunemēt seruir pour preuenir & diuertir les grands inconueniens dedans lesquels les pays bas retomberoient par la

guerre, à laquelle fin toutesfois le sieur peckius
 veut sembler tendre, mais au contraire allume-
 roit plustost le feu de la guerre, en ce que c'est
 heurter directement la dignité souueraine, &
 grandeur des prouinces vnies, laquelle leurs
 Seigneuries ont iusques à present si loüablemēt
 defenduë par vne guerre si puissante, Encor
 bien resolu Dieu aydant de n'espargner pour
 sa manutention ny leurs biens ny leurs vies. Et
 declarent icelle Proposition erronee & insup-
 portable à leur Estat, attendu qu'elle tire la
 souueraineté en controuerse contre les Loix
 fondamentales du pays, & ne peuuent leurs Sei-
 gneuries consentir vne propositiō si inopinee,
 iniuste & inciuile, comme contenant vne iniure
 trop atroce contre leur Estat, & qui tourne
 à l'opprobre de tant de Monarques, Roys, po-
 tentats & Républiques, qui ont contracté avec
 leurs Seigneuries, comme avec vn Estat libre
 & souuerain. D'abondant sont contraints de
 declarer que tous ceux qui par propositions ou
 autres voyes taschent d'aneantir la souueraine-
 té de ces pays & choses semblables, seront tenus
 pour inhabiles d'estre iamais admis en aucun
 Traicté avec leurs Seigneuries. Ce qu'ils don-
 nent pour Responce audit sieur peckius, y ad-
 ioustans seulement que lesdits Archiducs peu-
 uent bien scauoir comment lesdits Seigneurs

461
170 Estars entendēt que le Traicté de la Treue soit
par eux, & par le Roy d'Espagne obserué, veu
que nulle satisfaction ne s'est ensuiuie de tant
de plaintes par plusieurs fois reïterees à leurs
Alteſſes. Faict à l'Assemblée des hauts & puissā
seigneurs les Estars Generaux des prouinces
vnies à la Haye, le 25. de Mars 1621.